

## LA CIGALO E LO SEGAIRE (J. H. FABRE)

Jour de Diéu, queto caud ! Bèu tèms pèr la cigalo  
Que, trefoulido, se regalo  
D'uno raisso de fiò ; bèu tèms pèr la meissoun.  
Dins lis erso d'or, lou segaire,  
Ren plega, pitre au vènt, rustico e canto gaire :  
Dins soun gousié, la set estranglo la cansoun.

Tèms benesi pèr tu. Dounc, ardit ! cigaleto,  
Fai-lèi brusi, ti chimbaletto,  
E brandusso lou vèntre à creba ti mirau.  
L'Ome enterin mando la daio,  
Que vai balin-balan de-longo e que dardaio  
L'uiiau de soun acié sus li rous espigau.

Plen d'aigo pèr la pèiro e tampouna d'erbiho,  
Lou coufié sus l'anco pendiho.  
Se la pèiro es au fres dins soun estui de bos,  
E se de-longo es abéurado,  
L'Ome barbèlo au fiò d'aquéli souleiado  
Que fan bouli de-fes la mesoulo dis os.

Tu, Cigalo, as un biais pèr la set : dins la rusco  
Tèndro e jutouso d'uno busco,  
L'aguño de toun bè cabusso e cavo un pous.  
Lou sirop mounto pèr la draio.  
T'amourres à la font melicouso que raio,  
E dóu sourgènt sucra beves lou tetadous.